

Wulf Wagers wunderliche Weltbetrachtung

Nackt selber ausg'sperrt

Wo i vor a paar Jahr mein Vierzger ghet han, han i mir von meine Freind zom Feschta a Sauna schenka lassa. So tolle Freind han i!

Wo i die 's erscht Mol ausprobiert han, hemmr grad onser Haus neu streicha lassa. Deshalb war alles rengsrom ei'grüschtet. Mei Frau war en dr Sengstond ond meine Kendr em Bett. So han i en aller Ruhe sauniera kenna, ohne dass mi ebber g'stört hätt. Noch em erschta Durchgang han i nadierlich an d' frische Luft wella.

Weil aber dui Terrassatür weg am Grüschd versperrt war, ben i noch em Sauniera zom Abkühla durch's Büro en da Garta ganga. I han dui Bürotür wega dr Kälte zuagmacht, aber net dra denkt, dass mr dia von außa gar net öffna ka.



Jetzt be i schee bleed en dr Kälte em Garta gstanda ond han net recht gwisst, wia i wieder ens Haus komma sott. Meine Kendr hend auf Rufa ond Stoila ans Fenschter schmeißa net reagiert. Mei Nochbre hätt jo en Schlüssel g'het, aber so vertraut warat mir selbichs Mol no net, als dass i hätt nachts om zehne näckedich an ihra Haustür hätt klingla wella. Des hätt vielleicht zu Missverständnis führa kenna.

Jetzt war guadr Rat teuer. No han i mi aber erinnert, dass i 's Fenschtr en dr Sauna zom Lüfta aufg'lassa han. Des isch a Kellerfenschter ond i han no durch da Lichtschacht wia a Dieb en mei eiges Haus eisteiga miassa. Wo i grad halbe durch's Fenschter war, isch onda dr Hockr omghagelt ond i han mir bei narutscha da ganze Buggl von oba bis onda aufkratzt. Des hot ausgsäha, wia wenn i da wildeschte Sex aller Zeita ghet hätt. Leider war des net so, au, wenn mei Frau des z'erschd vermutet hot. Seither gang i nie meh ohne Hausschüssel en d' Sauna. Vor allem, weil i inzwischa Kellerfenschtersicherunga eibaut han ...
Bis näggschd Woch'
Ihr Wulf Wager